

# **ROMANTICA**

## **Aidi, dipunâ!**

-Aidi dipunâ, dipunâ dit tserú  
Aco iu mintea-ts ti pitreatsi cathi seară  
S-nj-adunj zboari di vreari  
S-nj li-tori kicuti di ploai  
S-ti-acrescú Tini, lilici, tu gârdina vreariljei

-Aidi dipunâ, dipunâ pi scara kirolui  
Tsi lu-adunash tu-inima tau mash ti mini,  
S-mi tsânji veardi  
Kirolu-a tâlú s-tukeashti shi-nj curâ tu-suflitú  
Di câti ori stai ninga mini sh-dultsi mi bashi  
Mini escú kirolu-a tâlú  
S-tini eshti oara tsi lu-misoară  
Di-cândù doljii câdzum tu vreari  
Tu-atselú ascâptitatú di soari  
Tsi ni-arâki zboarili cu mushuteatsa lui...  
Noi, fâr-di eali, ni li-pitricum sufiliti  
Si s-primnâ, mânâ di mânâ, pi-calea aroshi  
Tsi u-ashtirâ tu-amari, atselú ascâpitátú di soari  
Sh-mutrinda primnarea lor, ni-kirum tu vreari...

-Hai dipunâ, dipunâ dit tserú

Pi bratsu-a melu, tsi-nj s-i teasi s-ti diznjardâ

S-ti ljea, si-nj ti-dipunâ tu-atselú cohiú dit inima meu

Mash ti tini gârdinâ, si-nj ti-acrescú lilici di vreari

Aidi, dipunâ...dipunâ...dipunâ...

## Mini sh-tini

-Vruta meu!

Ma tini eshti steau

Mini va s-escú lunjina tau

-Vrutu-a meu!

Ma tini va s-eshti steau

Mini va s-escú ocljiu tsi va s-ti mutreascâ di-sum lunâ

Sh-dit lunjina tau, va si-nj facú cârunâ

-Ma tini eshti puljiú azbuirâtorú

Mini va s-escú aripili-a tali s-ti ducâ tu-analtú di-munti

Si-lj duts-ali dadi, vrearea noastâ

S-u-acreascâ tu sârmânitsâ.

-Ma tini va s-eshti puljú azbuirâtorú

Mini va s-escú simitsâ s-ti hârescú cu vrearea meu

-Ma tini eshti inimâ

Mini va s-escú sândzili tsi treatsi ca s-ti tsânâ yie

-Ma tini va s-eshti inimâ

Mini va s-escú keptu cari va s-ti tsânâ mash ti-mini

-Ma tini eshti suflitú

Mini va-s-escú doru-a talú ii vrearea noastâ,

Tsi u-anyisam dolji di-anda njits

-Ma tini va s-eshti suflitú  
Mini va s-escú uhtatu-a lui  
Ma s-nu nj ti-vedú-nâ searâ

-Ma tini eshti lilici  
Mini va s-escú njurizma-ljei  
Sh-va-nj ti-facú primuvearâ  
-Ma tini va s-eshti trandafilú  
Mini va s-escú araza di soari tsi ti-acriscu  
Si-nj ti da anja, ta si-nj ti portú tu cusitsâ

-Ma tini eshti cânticú  
Mini va s-escú iholu-a lui  
-Ma tini va s-eshti cânticú  
Mini va s-escú bairili-a lui

-Ma tini eshti niorú  
Mini va s-escú vimtu tsi ti-adutsi disuprâ-nj  
Si-nj ti-facâ aumbrâ pi-frâmti  
Veara cândù soarili mi-diznjardâ  
-Ma tini va s-eshti niorú  
Mini va s-escú kicutili-a tali di ploai  
Pisti gârdina iu-acrescú dorurili-a noasti di-vreari

-Ma tini eshti ascâpitatú di soari  
Mini va s-escú locu tsi s-anvârtashti  
Si-nj ti-vedú nâpoi tu-apiritâ  
-Ma tini va s-eshti ascâpitatú di soari  
Mini va s-escú lunjina tau tu-apiritâ

-Itsido va s-eshti, Tini, vruta meu  
-Itsido va-s-eshti Tini, vrutu-a melú  
Sh-iutsido, Tini va s-nedz  
Mini va s-escú lunijna di-cândilâ, tsi va s-ti veaglji  
S-nu ti-aspari, când scutidea va s-dipunâ.....

Ma azâ, mini escú mini  
Sh-ti voi, ti-tsi azâ eshti tini:  
Mash vruta meu!  
Mash vrutu-a melú !

## Dzâli kiruti

Nj-u feciú mintea azâ,  
S-negú si-nj caftú atseali dzâli tsi-nj tricurâ  
Fârâ si-ts dzâcú, cât ti-voi, fârâ s-ti-ambârtsâtedzú  
Sh-cu peru-a tâlú s-mi-agioc, sh-tu-ocljia tâlj s-mi kerú  
Cu lilici s-ti-nvescú, sh-tu njurizma tau s-mi diznjerd  
Sh-di mânâ s-ti ljau, s-ti primnú pi-calea vreariljei..

Tuti-atseali dzâli, voi s-li-adun, diznou s-li-ahurhescú  
Tu vreaki s-li tornú, cu tini deadun.

Nj-u feciú mintea azâ,  
S-negú, si-nj caftú atseali dzâli tsi-nj tricurâ  
Când mi-agârshai ti tsi mi-amintai  
Când mi-agârshai s-cântú, s-giocú s-arâdú  
S-mi hârâsescú câ-apirii, sh-tini ninga mini s-hii  
Dzâli kiruti, iu sh-mini kirui  
Dâzli uscati, iu sh-mini mi-uscai  
Dzâli moarti, iu sh-mini murii  
Dzâli dispuljeati, dispâltiti, tu-scutidi ascumti  
Iu-ali liyii, lj-easti dorú di-ocljia tâlj

Tuti voi s-li-adun, diznou s-li-ahurhescú

Tu vreami s-li tornú, cu tini deadun.

Ti tsi apirish azâ, tini soari?

Ti tsi yiulutseshti, tini lutseafirú, sh-tini lunâ, sh-voi steali?

Ti tsi cântats, voi pulji?

Turnatsi-nj atseali dzâli, di-aco iu li-kirui!

Tuti s-li-adun, diznou s-li-ahurhescú

Tu vreami s-li tornú, cu vruta-nj deadun !

## Dau giunitâts

Di vâr kiro mi scolú mash giunitati

Alantâ, un-yisú nj-u-arâki.

Ma tora, nu va dit-yisú si-nj si-toarnâ

-Ta s-escú omú, ânj-dzâsi, mi fânâtii!

-Fârâ di tini, âlj dzâshú mini, ti tsi s-bânedzú?

Nu voi s-am mash un cicior ta s-imnú

Mash cu-unâ mânâ, s-mi minú

Mash un ocljiú, giunitati s-mi vedú

Nu voi s-amú unâ inimâ disicatâ-n-dau

S-bânedzú mash cu giunitati di-harauâ

Nu voi ta s-amú un suflit tsi s-mi doarâ

Sh-cu boatsea mutâ s-u plângâ-alantâ giunitati-a meu.

Nacâ vâhi nitsi nu ti-amintash

Sh-mash, tu-nyisili-a meali tini bânash?

Nâsâ, nitsi nu gri; âncâlicâ yisu sh-fudzi.

.....

Mini, giunitati cum nj-iram, tu amari dipunai

Aco iu, dit-unâ simitsâ di-lunjinâ mi-amintai

Scâpiratâ di-ndzeanâ, cashti di-iu, cashti di-cai

Ta s-lu-antrebú strâ-papu Niptun:

-Ta s-nj-u aprokiú-alantâ giunitati, tsi si-lj spun?

-Alantâ giunitati-a tau, dzâsi papu Niptun



Easti mash un-yisú, di-când tini ti-amintai tu-amari  
Ea ti-acriscu, ti-analtsâ di-agiunsesh s-aladz pit steali

Ma di-ahânti ori, tini, tu-inati, giuimatea ts-u-vâtâmai  
Di crutsi u-spindzurai, u-angrupai sh-nâpoi u-disgrupai  
Sh-nâpoi u-loai tu-bratsâ, u-diznjirdai, sh-âlj câftai ljirtari...  
Shtei câ fâr-di nâsâ, bana nu ts-avea hari  
Câ fârâ di nâsâ, va s-bânai ca-vâr peashti, kirutú tu-amari.  
Yisu-a tâlú bânâ cu tini, ca omú, sh-tuti tsi li-hunâpsi  
Câ pistupsea mâratu, câ tu-unâ dzuâ,  
Sh-tini va s-agiundz yisú ta s-hii.

-----

Fudzii di la papu Niptun anvirinat sh-pi minduiari  
Sh-di-atumtsea, dzuâ sh-noapti, giuimatea nj-u caftú  
Câ fâr-di ea, di-yisu-a melú, bana nu sh-ari hari.

## Suflit di primuvearâ

Vini ninga-nâ toamnâ sh-cashti câti kirolu alti va s-misoarâ  
Shedú mardzina di-arâu, deadun cu suflitu, inima, mintea sh-vâr  
di noi nu greashti...

Tâtsemú sh-mutrimú toamna, cumú stranj rudziniti  
sh-ashtearâ, vimtu s-li usucâ  
Mânâ di mânâ, apa sh-kirolu ayunjiusiti curâ  
Rudzina s-nu li-acatsâ, bana ninti s-ducâ...

Cadú frândzi galbini... vâra nu greashti ...vâra nu plândzi  
Cad sufliti uscati tsi plângú, ma plângu-a lor nu s-avdi...  
Cadú yisi agârshiti, a-cui sunt vâra nu shtii...  
Vâhi nâdia li-kiru pit câljiuri...

Pulji fudzirâ sh-elj cu vimtu sum-aripi  
Ponjli, fârâ di boatsi, tindú bratsâ dizguliti,  
s-caftâ pit tserâ lunjinâ  
Dedzâli-a lorú uscati, acatsâ s-da dorú di primuvearâ...  
Mini lu-adun doru, ca poami, sh-lu-ncljdú  
tu cufumi, di kiro umblisiti  
Pulji când si-s toarâ, setea si-sh curmâ

Ponj oarfinj tacú sh-mutrescú

Cum kirolu treatsi sh-deapinâ dzâli niahurhiti

Când sh-când, dedz kicâ lâcrânj verdz

Sh-toamna cu eali fatsa sh-u spealâ

Vâhi plângú ponlji di dorú di-pulji, di-vimtú sh-di primuvearâ

Ma toamna ananghi nu-ari...

Vrea s-mi-nveascâ sh-mini cu stranj rudzâniti

Ma nu-nj sunt uidisiti sh-armashú ninga veardi...

Cadú frândzi moarti...cadú sufliti frâmti tu-suflitu-a melú,

Iu-ninga easti primuvearâ, iu-frândza -virdzashti,

Iu suflitu s-avdadzi, si-amintâ, diznou.

## Hiu, ama nu hiu?!

Nj-aducú aminti di-anjli di liceu...

Nu shteam ti tsi mi-amintai i, cari hiu Io

Nu shteam ti tsi bânedzú, ti tsi-imnú sh-ti tsi-adiljú

Nu minduiam ti tsi-escú, icâ tsi va s-hiu...

Nu minduiam câ "azâ" treatsi, sh-câ mâni, "azâ" nu va s-hibâ

Câ-azâ va s-mi kerú tu-ascâpitatâ

Sh-câ mâni, va s-mi aflu nâpoi tu-apiritâ

Mi-primna vimtu di-mânâ cum-âlj vrea kefea

Ma mini ananghi nu-aveam, sh-nitsi nu câftam vârâ cali

tsi s-mi ducâ, aco câtâ-iu nu shteam

Câti vloarâ, mutream tserlu nalbastâ sh-frândza veardi

u-mutream

Videam cumâts di-soari cum sum-aumbri s-ascundea

Cumú dit lunjinâ s-aminta aumbra

sh-dit-aumbrâ, lunjina s-aminta

Ore, tsi s-amintâ prota?, aumbra ma lunjina?

Vâhi dauli s-amintâ cu-unoarâ?!, pi-minduiari antribam

Câ lunjinâ fâr-di aumbrâ, nu-aveam vidzutâ vârâoarâ...

Di multi ori, oclji multú alargú nji-lj pitritseamú

Ta s-mi aflâ, s-mi-adunâ di pit câljuri...

Câ nitsi mini, pi iu-alâgam, pi-iu mi-kiream, nu shteam...

Mult nj-arâsea s-negú tish pân-aco,

Iu-locu sh-tserlu s-ljia di s-adunâ,  
Tragú dolji duani sh-dzâcú isturii  
Cum bana, sh-amindolji, pâna tora sh-u-târcurâ...  
Mini shideam kirutú pi-minduiari sh-lj-ascultam  
câ vream s-anvetsú, sâ shtiu,  
Mini di-iu yinu, mini tsi-escú sh-ti tsi bânedzú  
Mini hiu, ama nu hiu?!

\*\*\*

Unoarâ vidzui un nior cum treatsi...  
Aumbra pisti locu, cu pirifanj sh-u primna  
S-agiuca sh-elú cu lunjina, ma u-ascundea, ma u-silighea  
-Ore di-iu yini sh-tini, sh-cari sh-tini ti-amintâ?  
Sh-iu ts-u duts aumbra?, mintea meu lu-antribâ.  
Niorul cânda mi-mutri, sh-aumbra lui, pi frâmti nj-u-ashtirâ  
-Yinú di la vruta-ts cari, cu lâcrânj mi-ncârcâ s-tsi li-kicú  
pi-fatsâ, ta s-ts-u lu-astingú doru tsi tu-suflitú ts-ardi;  
Di-alihea fatsa mea plândzea  
Sh-nioru acâtsâ sh-elú s-plângâ, cu lâcrânj di la vruta mea  
Sh-atumtsea, cânda mi dishtiptai, mi cutrâmburai  
Sh-acâtsai s-fugú, s-fugú di-mini, s-fugú s-mi kerú,  
s-nu-nj mi-vedú...câ vream s-mi amintú diznou  
tu-alt locú, tu alt kiro  
Iu mini, s-lu-ancalicú vimtu, s-mi ducâ mini, aco iu sâ shtiu,  
Ti tsi escú, ti tsi bânedz, sh-ti tsi va s-hiu...

Aco, iu-ascâpítatu tu-vreari s-tukeashti  
sh-u toarnâ vrearea tu-apiritâ...

Aco iu s-amintâ vrearea, aco voi si-nj bânédzú, aco voi  
si-nj hiu, câ fârâ di-vreari, mini, nu voi si-nj mi shtiu

Câ mi fânâtii, tserlu s-lu-antrebú:

“Mini hiu, ama nu hiu?”

## Icuatsii di Zboarâ

Azâ-arupsh un peaticù di tserù-nalbastù

Oclji di lâvilji s-nji lj-ashtergù...

Vidzui n-doi niori cum mânâ di mânâ s-primna

Sh-dupu elj trâdzea, ca vârù hir di mârdeali, aisti zboarrâ:

“Averu+Vreari=Dumnidzâ”

Asear-noaptea pi-unâ steau mi-alinai

Niheamâ lunjinâ s-adun, mintea s-nj-u spelù di lâvilji

S-nj-u bagù tu sârmânitsâ rihati s-doarmâ...

Vidzui unâ cometâ, cu cusitsa dispultitâ di-un vimt galactic

Cum trâdzea dit-ahundamea scutidoasâ a-universui

Un hirù, ca vârâ pirâ, tsi nu s-bitisea

Sh-cu ghrami di foc tseru lu-kindisea cu aisti zboarrâ:

“Averu+Vreari=Dumnidzâ”

Cum durnjeam, un-yis mi-arâki sh-mi dusi pi câravea-al Noe,  
namisa di prici, di prâvdz sh-di n-doi oaminj...

Mutreamù soarrâ, cumù-ascâpita, tu-unâ amari di lâcrânj

Tsi ninga kica dit zboarrâli cljsi tu-hapsea vivliljei-al Abraham

Sh-când soarrâ ahurhi ta s-vearsâ sh-elù lâcrânj di focù tu-amari,  
s-avdzâ un cântic;

Prici, prâvdz sh-atselj n-doi oaminj, cu-unâ boatsi-n cor

anjia-nj cânta aisti zboarrâ:

Averu+vrearea=tini isush!

Mi dishtiptai ca-aspâratù sh-mintit tu minti...

-----

Sh-azâ, cathi clipitâ u-vedù aistâ icuatsii di zboarrâ

Di tserù spindzuratâ cum sta,

Ma tora ved un semn di-antribari tu soni

Averu + Vrearea =?

Sh-minduiescù, câ apandisi va s-pot si-lji dau

Când sh-mini tu tseru va s-mi-analts spindzurat si-nj stau.



## Lunjina dit sinduki

Mi-amintai tu-un kiro tsi nu ira-a melù...  
Mi-amintai tu-unâ casâ tsi nu ira-a meu,  
Iu-MINI, nu puteamù MINI s-hiu....  
Sh-fudzii di-anda njicù s-nj li-aflu, sh-kirolu sh-casa...  
Ma nu shteam iu sunt...icâ... sunt iuva...  
Calea, cum nidzeam... vidzui -nâ moashi...  
Lunjina di pit-aumbri u-aduna  
Sh-u scârmina, cum scarminj lâna s-u curâ di lâvilji...  
Dit ea, hir di-lunjinâ shutsa,  
Sh-gljemi di lunjinâ tu-poalâ sh-li-aduna...  
Lo un gljiemù-ntru-mânâ, sh-câtâ apiritâ lu-dipinâ  
Kirolu s-lu misoarâ ....câ vâhi agârshe  
Câts-anj avea tricutâ di când ea s-amintâ...  
Altù gljiemù di lunjinâ, câtâ ascâpitatâ lu-silighi...  
S-dipinâ gljjemu...pânâ când scutidea acâtsâ lunjina s-u tukeascâ  
Mutrea moasha ciudusitâ, cum-ali scutidi lj-ira foami di lunjinâ  
Sh-acâtsâ-ntroarâ dit hiri di lunjinâ, câltsinj ta  
s-âmpulteascâ...  
Mi apruckeai niheamâ, sh-nâsâ mi mutri cu oclji ca di lunjinâ...  
-Tsi cafts lâi gione, tsi cafts pi-aistâ cali-ânj gri moasha sh-ninti-  
mpultea...  
  
-Nji-li caftù casa sh-kirolu, mumâ,

câ voi s-mi-amintù ninga nâoarâ  
Câ-aco, iu-prota mi-amintai, bânai ca-xenu di mini  
Sh-ca xenu di-mini, nu voi si-nj bânedzù vâroarâ!  
Mi lo moasha di mânâ, sh-tu casa-ljei mi dusi,  
Sh-unâ sinduki veaclji, cârtsâni jilos, când moasha u-zdicljisi...  
-Aua nj-u-am adunatâ paia tutâ, di-anda nj-iram featâ  
Vilendzi, batanii, stranj, gljiemi pârpodz sh-câltsinj  
Paia tutâ, dit lunjina tsi u-adunai di pit-aumbri, faptâ!  
A-s-ti bagâ muma tu sinduki, trei dzâli sh-nopts  
tu lunjinâ sâ stai  
Ama s-nu-ai ananghi, câ mini va-s-ti vegljiù  
Sh-paia meu, dit lunjinâ faptâ, va s-ti hâreascâ.  
Mini tu sinduki-ntroarâ mi bâgai, sh-dukeamù  
Cum-heam-câti niheamâ  
Lunjina dit sinduki acatsâ s-mi takeascâ....  
Trei dzâli sh-nopts tricurâ, sh-vini moasha-mbratsi di mi lo  
Sh-mi bâgâ tu sârmânitsâ ta s-mi-acreascâ  
Câ tu lunjina dit sinduki mini mi-amintai diznou!  
Nj-u-aflai casa tu lunjinâ, sh-tu lunjinâ-a melù kiro....  
Tora, dukescù câ-escù mini, sh-câ mini, hiu Io!

## Un-yisú ti-Armânamea

Tsi nyisú nji-avui asearâ ti-Armânami ta s-nu kearâ!

Mini stri-nâpot di prefts, di-armatoli shi celnits mâri

Mi-aleapsi Armânamea, s-mi-analts-aco tu tserú

S-mi adun cu Dumidzâlu sh-cu tuts sântslji dit-ubor

Ta s-lj-antrebú cu-anvirinari:

-Ti tsi u-featsitú Armânamea, sh-tora u-alâsats di keari!?

Nu easti Ea tinjisitâ? Nu vâ-ari Voi tu vreari?

Pirifanâ a-Voastâ hilji, sh-tora u-alâsats di moari!?

Târcurâ dau njilji di-anj-nviscutâ tu a-Voasti stranj

Hilji-aljei, cu pirifanj, cârutsea ninti u-purtarâ

Sh-ti Voi, tu foc elj s-arucarâ

Câ nu vrea-a Voastâ hilji, Sânts Pârints, pi Voi s-vâ kearâ!

Âlj deadi-tú-nâ limbâ dultsi, harú ti cântic, ti giucari

Mushuteatsâ tu surati,

Cama gioanâ sh-tinjisitâ, tu tutú laolu-a Vostú nu-ari!

Câtse-alanti ma multú s-bâneadzâ!?

Câtse-alanti ma multú s-adilji!?

Nu easti sh-Ea, Armânamea, multú dârutâ-a Voastâ hilji!?!

Câtse, pi-atselj tsi u-agudirâ, u-tâlj arâ, u-arâspândirâ

Tsi-lj loarâ casa, limba, numa, sh-cilimeanjli fârmâcarâ

Nu lji-acljimatú la giudico?!

Armânamea hiljea Voastâ, nu vrea s-facâ fânico!  
Vrea s-u-alâsats sh-Ea ta s-bâneadzâ,  
S-aibâ sh-Ea un locú sumú soari, namisa de-alanti milets  
Cu vreari sh-akicâseari!"  
NJi-ascultarâ Sâmtslji zboru, cu-anvirinú, nipistupseari  
Tish cânda Elj, dip nu shtea, cá hiljea Armânamea s-keari!  
Acâtsarâ tuts s-zburascâ, bâtea gura, bâtea mânjlji  
Niscânts acâtsarâ s-aurlâ, alts acâtsarâ s-plângâ...  
Mash Dumidzâlu tâtsea sh-nu grea...  
Ma di-unoarâ tuts s-curmarâ...  
Dumidzâlu ca-nâ lunjinâ, s-anâltsâ sh-la mini vini...  
Ncljishú oclji sh-dzinucljeai...  
-Tini Hiljiú di Hiljia-Noastâ, avdzam zború di Dumidzâ  
Toarnâ-ti la Armânamea, cama mari-a Noastâ Hilji  
Dzâ-lji câ u-agârshim niheamâ, ma u-avemú tu minduiari!  
Tuti tsi li-tricu mârata, tuti Neastimtlu li-featsi  
Atselú lailu cu coarâ, tsi lu-avemú ti-vâtâmari!  
Hiljea noastâ Armânamea, câtú Himú Noi aua-ndzeanâ  
Va s-hibâ daima tu-banâ!  
Noi va s-vigljiemú putés s-nu kearâ!  
Mi dishtiptai cu multâ harau sh-irushi vâ scriu sh-avau  
A-voastâ s-hibâ sh-haraua meu!

## Mindurierili-a meali

Nu! Nu voi s-angrâpsescù azâ zboarâ uidisiti  
Mindurierili-nj yinù shi-nj fugù, ama câti vloarâ nji li-acatsù...  
Ta s-nu li-kerù, nji li-ljiau sh-li tsesù tu bairi di zboarrâ  
Sh-nji li-ndesù tu trastu-al papu, sh-li-mpartù ca dhoarâ  
Anda negù s-mi primnù pâzari...

Primuveara anda negù tu livadi,  
nji li-ljiau di li-spindzur tu ponji  
Di gutunji, prunji, meri, gorts, cires sh-nuts...  
Mi-ashteru tu-aumbra lor sh-li vegljiu cumù da bâbuki  
Sh-cumù bâbukili da liliuci, sh-liliucili s-toarâ tu poami  
Sh-poamili li-mâcâ cilimeanjli, sh-ocljia-a lorù, ljia s-da bâbuki di-  
lunjinâ

Alti poami cadù pi locù di li-ljia pulji, sh-pulji azboairâ pi citia li-  
casi, sh-acatsâ di nji li-cântâ mindurierili  
ascumti tu poami...

Când yini iara, nji li-dau mindurierili-ali dadi si-nji-mpulteascâ  
pârpodz di lãnâ, icâ vâarâ vilendzâ,  
ta s-njiu lu-tsãnu sufitlu tu-câldurâ

Altoarâ, cândù mindurierili vearsâ pisti mini ca vâarâ ploai zurâ sh-  
ayunjusitâ, nji li-adun tu ghiumili-al Papu

sh-nji li-beau peanaga, peanaga noptsili,  
cândù kirolu tsi nji-u lu-alâsã muma tu sinduki nji s-i curmâ tu  
gurmazù

U-vedû muma ca pit-yisù, cum li-aduna minduierili-a ljei  
Sh-li shutsa tu hirù di lãnâ  
Câti vloarâ muma nji-Ii dinjica minduierili-a ljei tu lapti...  
Tsãnù minti, câ mini lu-bâgam laptili tu trei putiri  
Tahinãrili, un putirù lu-bâgam tu firidâ,  
ta s-anganù arazili-a soarui  
S-li-acatsù, s-li dinjicù, ta s-mi fânâtescù di lunjinâ

Când fudzea soarili, di s-ascundea sum locù  
Ta s-nu-sh lâvushascâ deadzitili di kisa noptsâljei,  
Un altù putirù lu-bâgamù pi-ugeagu-ali casi  
S-anganù tuti yisili, atseali cama mushatili,  
ta s-li-acatsù s-nji li-facû câpitiinjù

Un putirù lu-bâgam pi masa dit-udãlu atselù bunu  
S-anganù tuti minduierili tsi li-alâsa oaspitslji tinjisits  
Tsi vinea ti muabets cu papu, ta s-li-acatsù  
s-nji li-hâresc pi-aradâ mintea, inima sh-suflitlu.

Câti vloarâ minduescù câ mini nu nji-escù omù...  
Sh-câ nji-escù mash-nâ Minduiari...

## Vrearea Armânească

Azâ voi s-hiu apâ aratsi dit fântânâ  
S-mi-adun di prit-oahti sh-di prit munts  
Voi s-mi dau, tu cupi di malmâ  
Armânjlor tsi-au seati di vreari armânească.  
S-mi dau sh-atsâlor tsi tu-xeani s-uscarâ  
Sh-dit hândakea etiljei s-lj-analtsù, diznou s-virdzascâ

Azâ voi s-hiu pâni caldâ, hoara tutâ s-mi anjurdzeascâ  
Sh-armânj cu foami di vreari, di mini si s-hâreascâ.  
Voi s-hiu cashu tu pita armânească  
Codhur di codhur, sh-la xenj s-mi-anpartsâ  
Câ mini escù, sh-ninga va s-hiu, xenjli s-adukeascâ!

Azâ voi s-mi disicù, s-mi dau la tuts câti niheamâ  
Tu cathishun dit voi  
S-bânedz shi s-morù, sh-nâpoi s-ânyiedz,  
Sh-deadun cu voi, s-nj-u trecù aistâ banâ  
Sh-tsi voi s-hiu mini azâ...  
Apâ aratsi, pâni caldâ sh-cashù tu pita armânească  
Vi li-dau tuti-a vau...  
Sh-dit vrearea mea ti Voi, tu Voi, vreari s-acreascâ  
Ti-armânj sh-ti Fara Armânească!

## Hroma suflitui

Mutrescu toamna prit firida suflitui...

Tuti hromili li lo vimtu

Mash unā hromā n-sāndzinatā arāmasi

Tsi nj-u nviscu inima...

Sh-dit hoarā fudzirā tuti hromili...

Mash unā hromā n-sāndzinatā arāmasi

Tsi li-nviscu tuti casili...

Sh-ploacili di casā kicā hromā n-sāndzinatā...

Dit tseru dipunā un kiro n-sāndzinatu

Tsi u-anvili hoara sh-u bāgā tu somu...

Iu eshti tini Armāname

s-li-aduts tu nāpoi hromili ali hoari

Ta si s-dishteaptā Armānjli a melji dit somu

Cā shi suflitu a meu n-sāndzinatu adastā...